

INUIT ATAQATIGIIT

Inatsisartuni



UPA 2019/175
15.05.19
Múte Bourup Egede

Maleruagassat atuuttut aqcutigalugit aalisarnerup aqutsivigineqarnerata allanngortinneratigit Upernaviup aqutsiveqarfiani qaleralittassiissutit tamakkerlugit aalisarneqarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Aalisarnerq nunatsinni inuussutissarsiutigaarput ulluinnarni inuuniarnitsinnut qitiulluinnartooq nunatullu aningaasarsiornikkut atugarissaarnikkullu toqqavigisarput. Inuussutissarsiornikkullu assigiinngisitaarnerusumik ineriartortitsigaluaruttaluunniit ukiuni qulikkaarpassuarni suli pingaarnertut aalisarnerq pingaarnertut inuussutissarsiutigissavarput. Soorlu ukiuni maani nunami inuunnarsimasinnaanitsinnut imaaniit uumassusilinnik inuuniuteqarsimanerput assigalugu.

Aalisariuutsit nutaat kingulittalu aalisagartassaqaartuarnissaat tunngavigalugu piujuartitsinermik tunngavilimmik aalisarnerq ingerlattuartariaqarparput. Tamannalu tunngavigalugu aalisagartassat pisassiissutigineqarsimasut sapinngisarput tamaat atorlugu amerlanerpaat qaqinneqarlutik suliffissaqartitsinikkut aningaasarsiornikkullu iluaqutiginnissaat qulakkeerniartuartariaqarparput.

Naalakkersuisut siunnersuummut akissuteqaataat arlalitsigut maluginiagassartaqarpoq. Naalakkersuisummi siunnersuut una Aalisarnermut inatsisissaq pillugu ataatsimiitsitaliarsuarmut suliakkiutiginerarpaat. Tassa imaappoq ataatsimiitsitaliarsuup sulinerata nalaani inatsisissallu qaqaguugaluarnerasoq suliarineqarsimalernissaanut, pisassat iluanni inatsisillu atuuttut aallavigalugit illersorsinnaasumik aalisarluartoqarsinnaanera utaqqitinniarneqarpoq Naalakkersuisuniit. Ilumut Naalakkersuinikkut tamanna illersorsinnaavarput?

Taassuma saniatigit naluneqanngilaq Naalakkersuisut aaliangersarsimagaat Aalisarnermut inatsisissaq pillugu ataatsimiitsitaliarsuarmi Naalakkersuisooqatigiit tapertaasalu kisimiillutik politikikkut malinnaasutut peqataanissaat. Aali Naalakkersuisut nuna tamakkerlugu siammasissumillu aallavilimmik aalisarnermut inatsisiliornissamik suuaruteqarsimagaluartut. Tamanna oqaasiinnaasoq paasinarpoq qinersisartummi affangajalluinna Naalakkersuisuniit matoqqasumik sulineq toqqarlugu, illuatungiliuttut sulinermut malinnaasinnaajunnaarlugit maanna inissereerpaat. Nunap aningaasarsiornikkut nappataa ukiorpasuarnilu nappatigiuagassaa pitsaasumik tunngavissaqartinniavissorsimagutsigu taamaattoqarsinnaanngilaq.

Naalakkersuisut siunnersuummut akissuteqaamminnittaaq oqariartuutigaat killeqanngitsumik aalisarfiit, titarnilersuineramik aamma taasakkagut atorunnaarsissallugit allatulluunniit aaqqiivigissallugit oqariartuuteqartut. Inuit Ataqtigiiit paaserusupparput suliaq taanna qanoq siunertaqarnerisq. Nalunngilarpummi Naalakkersuisut ukiaq aaliangiukkaat ukioq mannamiit atuutilersumik sinerissap qanittuani qaleralittassat appariartuaartinneqassasut uumasorsiuut innersuussutaannut naapertussarlugit. Ersarissumik paaserusupparput piujuartitsiumalluni taamak aaliangersimaneq suli Naalakkersuisunit attanneqarnerisq, inussiarnersumillu kissaatigalugu Naalakkersuisut paaserusutarput akissagaat. Akissumminilu ukiuni tulliuuttuni sinerissap qanittuani qaleralittassat qanoq appartinniarneqarnerisut aamma nassuiassagaat kissaatigalutigu. Paaserusupparputtaq titarnilersuilluni killeqanngitsumik aalisarfittut taasartakkagut allannguiffiginerini qaleralittassanik qaffaasoqarniarnerisq.

Siunnersuuteqartoq Inatsisartunut ilaasortaq Aqqaluaq B. Egede, Inuit Ataqtigiiit qutsavigaarput maleruagassat atuutereersut aallaavigalugit illersorneqarsinnaasumik Upernaviup aqutsiveqarfiani pisassat amerlanerpaartaasa aalisarluarnikkut iluaqutigineqarnissaannik siunnersuuteqarmat. Uani aalisapilutsitsisoqarnissaa siunertaanngilaq. Siunertaallunili maanna piujuaanartitsineramik tunngaveqarluni periarfissaareersut atorluarneqarnerunissaat.

Siunnersuut ilalerlugu sukumiisumik Aalisarnermut, Piniarnermut Nunalerinermullu Ataatsimiitsitaliamut innersuupparput.